

Mutrikun izango da *Spraikada* '09, Euskal Herriko Graffiti Lehiaketaren 6. edizioa

- Lehiaketaren buruz burukoa uztailaren 18an izango da
- Izena emateko epea ekainaren 30ean amaituko da
- Herriko hormak museo bihurtuko dira

DONOSTIA, 2009/05/26.- Duela sei urte hasitako bideari jarraituz, aurtengoan Mutrikun egingo den [Spraikada](#) aurkeztu du [Topagunea Euskara Elkartearen Federazioak](#). Lehiaketa seigarren ediziora iritsi izana “*duen harrera eta indarraren seinale*” dela esan du Topagunearen Gazte Saileko arduradunak, Sonia Perez Anguerak. Era berean, bihotzez eskertu du **Mutrikuko Udalaren** partetik *Spraikada* aurrera eramateko jasotako **laguntza eta elkarlanerako gogo**a.

Antolatzaileek azaldu dutenez, *Spraikada* hitzordu klasiko bilakatu da dagoeneko euskal graffitigile eta zaletuen artean. Era berean, euskal graffitigintzaren harrobiaren erakusleho paregabea ere bada *Spraikada*.

Kaleko hormak, museo

Gaurko aurkezpenaren helburua lehiaketaren berri ematea zen: Mendaro, Getxo, [Tolosa Gernika-Lumo](#) eta [Erandio](#)tik pasatu ondoren, **Mutrikun** izango da aurreneko buruz burukoa, **uztailaren 18an**. Mutrikuko Udalak **800. urteurrena** ospatzen du aurreneko, Kutxaren laguntzaz, eta *Spraikada*ren buruz burukoa ospakizunen artean sartu nahi izan du. Era horretan, publiko gaztea ere urteurrenaren ospakizunetan inplikatzeko bilatzen du Udalak, eta Mutrikuko kaleetako hormak gaur egungo adierazpide artistiko honen museo bilakatzeko. Halaxe azaldu du Mutrikuko Udaleko Euskara eta Kultura zinegotziak, Iratze Garagarzak.

Buruz burukoan, betiko moduan, hamar graffiti lehiatuko dira, horretarako espresuki gordetako 7 x 2 metroko beste horrenbeste hormatan, **1.500, 1.200 eta 900 euroko sariak** eskuratzeko. Aukera paregabea izango da Mutrikun egun pasa egin, graffitiak egiteko prozesua zerotik jarraitu eta graffiteatzen ikasten hasteko ere, tailerrak eta bestelako jarduerak osagarriak ere ez baitira faltako.

Lehiaketan parte hartzeko, egin nahi den graffitiaren zirriborroa bidali behar da lehenengo eta behin, eta hori egiteko epea ekainaren 30era arte dago zabalik. Jasotako lan guztien artean, hamar onenak aukeratuko dira, eta horietatik izango dira Mutrikuko hormetan islatuko direnak.

Izen emateko baldintzei dagokienez, gutxitxo dira, eta betetzen errazak: 16 urtetik gorako gaztea izatea, graffitiko testuak euskaraz egitea, zirriborroa epea amaitu

aurretik bidaltzea eta, finalista suertatuz gero, aukeratutako zirriborroko graffitia antolakuntzak emandako sprayekin egitea. Hortik aurrera, estiloa, teknika eta gaiak libreak dira erabat.

Informazio gehiago nahi dutenek, dena den, euren herriko euskara elkartean zein interneten aurki ditzakete lehiaketaren oinarriak. Horretarako helbidea ondoko hau da: www.spraakada.com

Topagunea Euskara Elkarteen Federazioa 1997an sortu zen, eta Araba, Bizkaia, Gipuzkoa eta Nafarroako 93 Euskara Elkartek osatzen dute. Elkarteon zein Federazioaren beraren helburua euskararen erabilera sustatzea da. Horretarako, hainbat esparru lantzen dituzte, hala nola haur eta gazteen aisialdia, kulturgintza, tokiko hedabideak, mintzapraktika, entitateak euskalduntzea, sentiberatzea...